

四庫全書

經部

欽定四庫全書

經部

日講禮記解義卷十三

四

詳校官監察御史_臣查瑩

給事中_臣溫常綬覆勘

覆校官博士_臣劉光第

校對官助教_臣金學詩

謄錄監生_臣彭良歲

欽定四庫全書

日講禮記解義卷十三

王制

王制者記先王班爵授祿祭祀養老之法制漢文帝
令博士諸生作其書采集秦以前古書所載而又雜
取傳記之說故與周官孟子不盡合程子曰孟子時
載籍未經秦火然班爵祿之制已不詳今禮書掇拾
於煨燼之餘多出於漢儒一時之附會奈何欲盡信

而句為之解乎故凡鄭氏解有難通而指以為夏殷制者當分別觀之

王者之制祿爵公侯伯子男凡五等諸侯之上大夫卿下大夫上士中士下士凡五等

此言班祿爵之制而先舉制爵之大較也王者之治天下制為祿以馭其富也則因功之多寡而為豐殺焉制為爵以馭其貴也則因德之厚薄而為崇卑焉權之定於一尊如此就爵之通於天下者言之近於

天子以無私為德者爵惟公遠於天子而障扞於外者爵惟侯道足以長人者爵惟伯道足以養人者爵惟子道足以安人者爵惟男以次而差凡有五等皆助王以治天下者也就爵之施於國中者言之知進退而道足以上達者為上大夫卿知足以帥人者為下大夫才足以事人者為上士才能稍亞者為中士才能僅稱者為下士以次而差亦有五等所以左右其君奉天子之德而致之民者也案周禮大司徒以

賢制爵以庸制祿此先祿而後爵者田不分不可以制祿祿不制不可以定爵也列爵必以五等天地之中數也

天子之田方千里公侯田方百里伯七十里子男五十里不能五十里者不合於天子附於諸侯曰附庸

此言制君之祿通於天下者也民功曰庸天子有天下畿內之田方千里開方為百萬里非此不足以居重馭輕也天子而下有公侯其田方百里開方為萬

里伯則方七十里開方為四千九百里子男則方五十里開方為二千五百里其不足於五十里者不得會合列侯以朝聘於王但以其功勞附大國而達於天子則謂之附庸此制祿之大者也案孔疏七十里倍減於百里五十里倍減於七十里孝經緯云德不倍者不異其爵功不倍者不異其土故轉相半別優劣也蓋里數有二分服以衰計如二十五家為里者是分田以方計如方里而井者是分服則計道里遠

近以為朝貢之節分田則計田畝多寡以為賦祿之制也朱子曰豐鎬去洛邑三百里長安所管六百里亦有橫長處非若今世之為圖畫方也恐井田之制亦是類此又案書武成云列爵惟五分土惟三孟子及此經所言是也周禮大司徒諸公之地封疆方五百里其食者半諸侯方四百里諸伯方三百里其食者參之一諸子方二百里諸男方百里其食者四之一或曰孟子王制所言正封也周禮所言廣封也詩

云錫之山川土田附庸附庸者虛封土田者實封也
或曰大司徒論公侯伯子男之地各以封疆言而其
食者或半或參之一或四之一孟子王制專主田祿
即周禮所謂食者也或曰三代尺度不同夏極大殷
次小周極小故同此百里而周可言五百里四百里
如同此百畝而夏可言五十畝殷可言七十畝也此
亦求其說不得而姑云爾周禮為周公之書而在當
時未必盡行必欲合孟子王制而一之即其說愈焚

而終無確據如明堂位言封周公於曲阜地方七百里以開方法計之為方百里者四十九當得王畿千里之半是豈可信哉

天子之三公之田視公侯天子之卿視伯天子之大夫視子男天子之元士視附庸

此言制王朝有位者之祿也田謂所食之采邑三公師保傅也視猶比也天子之三公其田視公侯之百里天子之卿視伯之七十里天子之大夫視子男之

五十里天子之元士視附庸之或四十里或三十里
食邑之數以漸而差有內外無多寡也徐氏自明曰
先王之制出為列國之君入則為王朝之臣故畢公
保釐東土山甫徂齊式遄其歸春秋以來鄭武公為
周司徒鄭莊公為平王卿士蓋出入均勞先王之一
內外者如此所以內諸侯之祿即以外諸侯為準也
案周禮載師士田任近郊之地家邑之田任稍地小
都之田任縣地大都之田任疆地即此所謂視侯伯

子男者

制農田百畝百畝之分上農夫食九人其次食八人其次食七人其次食六人下農夫食五人庶人在官者其祿以是為差也

此言制庶人在官者之祿以農為準也百畝以周尺言之六尺為步步百為畝分謂分所當受者孟子作糞祿出於田之所入而數則起於農夫之百畝昔先王之制井田也以百畝為率百畝之分一夫受之而

田之所入不同惟上農夫能食九人其次則食八人次則食七人又次則食六人下農夫止食五人其以力田之上下為所食之多寡如此彼庶人在官而為府史胥徒者其祿率以是為差也賈氏公彥曰王制言下士視上農夫食九人則府食八人史食七人胥食六人徒食五人其官並亞士故號庶人在官此是官長所除不命於天子國君者案古者爵起於士而祿起於農明乎授田之法則逆而推之凡制祿之等

差俱可以坐而得也

諸侯之下士視上農夫祿足以代其耕也中士倍下士
上士倍中士下大夫倍上士卿四大夫祿君十卿祿次
國之卿三大夫祿君十卿祿小國之卿倍大夫祿君十
卿祿

此言制列國君臣之祿也惟庶人在官者以農為差
故諸侯之下士視上農夫祿蓋足以代其耕也中士
倍於下士上士倍於中士下大夫倍於上士卿四倍

於大夫君則十倍於卿此公侯大國之制也次國之卿三倍於大夫其君伯之祿十倍於卿小國之卿倍於大夫其君子男之祿亦十倍於卿案孔疏自下士至小國之卿倍大夫祿皆據無采地者言之大夫以下位卑祿少故大小國不殊卿與君祿重位尊故祿隨國之大小為節

次國之上卿位當大國之中中當其下下當其上大夫小國之上卿位當大國之下卿中當其上大夫下當其

下大夫其有中士下士者數各居其上之三分

此言諸侯使卿大夫類聘並會之事也其有中士下士者二句徐氏謂此錯簡當在上士二十七人之下國有大小之殊故其臣之等列亦異次國上卿之位當大國之中卿中卿當其下卿下卿當其上大夫而遞降一等小國上卿之位當大國之下卿中卿當其上大夫下卿當其下大夫而遞降二等其國有中士下士者則中士三倍於上士下士三倍於中士數各

居其上之三分案孔疏同是卿則小國卿在大國卿
下大國是大夫小國是卿則小國卿位大國大夫上
知者以卿執羔大夫執雁卿絺冕大夫元冕卿不得
在大夫下也

凡四海之內九州州方千里州建百里之國三十七
里之國六十五十里之國百有二十凡二百一十國名
山大澤不以封其餘以為附庸閒田八州州二百一十
國

此言天子畿外封建之制也九州周之揚荊豫青兗雍冀幽并也凡四海之內有九州州之從橫皆方千里每一州建百里之國三十以封公侯七十里之國六十以封伯五十里之國百有二十以封子男總計其數凡有二百一十國境內之名山大澤則不以分封至建國之所餘有已封人而不能五十里者則為附庸有未封人而待有功者則為閒田推之八州莫不皆然州各有二百一十國蓋畿外之制如此案周

禮九州之川澤山藪職方氏掌之而諸侯無所隸焉
亦以與民同財不得障管也朱子曰封國之制只是
漢儒立下一箇算法其實不然建國必因山川形勢
無截然可方之理若封王子弟必須有空地方可封
左氏載齊地蒲姑氏因之而後太公因之若武王不
得蒲姑之地即太公亦未有安放處

天子之縣內方百里之國九七十里之國二十有一五
十里之國六十有三凡九十三國名山大澤不以盼其

餘以祿士以為閒田

此言畿內封建之制也。盼讀曰班。與頌通。天子畿內與八州所建不同。故以千里之地分為百縣。縣內方百里之國九。以為公之采邑。七十里之國二十有一。以為卿之采邑。五十里之國六十有三。以為大夫之采邑。總計其數。凡有九十三國。名山大澤不以盼賜。至制國之所餘。則以為元士視附庸者之祿。或為閒田。以待有功。蓋畿內之制如此。案上節言封。此言盼。

者疏謂畿外有封建之義畿內不世位惟有盼賜也
凡九州千七百七十三國天子之元士諸侯之附庸不
與

此總言畿內外封建之制也凡四海之內九州八州
各二百一十國合王畿七十三國總為千七百七十
三國而天子之元士與諸侯之附庸皆不與蓋國至
五十里而止元士附庸惟不能五十里故取畿內外
之間田祿之也案先王衆建諸侯而居中以治凡畿

內外之定制無不可以數計而周知三代以來大畧如此

天子百里之內以共官千里之內以為御

此言畿內田稅之所給也天子畿內之地有在百里之內者其租稅所入以供官如郊廟社稷賓客燕享之類有司所供者是也有在千里之內者其賦稅所入以為御如乘輿服膳匪頒賜予之類王所用者是也蓋君子廉於奉已而嚴於事神人故其叙如此鄭

注以官為其文書財用恐非是

千里之外設方伯五國以為屬屬有長十國以為連連有帥三十國以為卒卒有正二百一十國以為州州有伯八州八伯五十六正百六十八帥三百三十六長八伯各以其屬屬於天子之老二人分天下以為左右曰二伯

此言畿外方伯畿內二伯之制也帥正伯皆長也老上公也千里之外設方伯以總之其制合五國以為

屬屬則有長取其仁足以長人而聯屬之也合十國
以為連連則有帥取其帥人而連比之也合三十國
以為卒卒則有正取其正人而萃聚之也合二百一
十國以為州擇一賢君加之一命為伯得專征伐總
計八州凡有八伯伯之屬為正者五十六為帥者百
六十八為長者三百三十六八伯各以其屬而上屬
於天子之老二人分天下以為左右而主之曰二伯
則如周初周召之任是也案八伯各為一州之伯即

曲禮所謂九州之長入天子之國曰牧也二伯為天下之伯即曲禮所謂五官之長曰伯也鄭注云凡長皆因賢侯為之

千里之內曰甸千里之外曰采曰流

此言分服之制也王圻千里之內名曰甸服甸者治田之義凡治甸田者納稅常厚食甸邑者朝見常密以在畿內而綜理為詳也千里之外近曰采取供給王事之義遠曰流取流放罪人之義凡在采流之間

者納貢漸薄朝見漸疏以在畿外而經畧有序也案禹貢五服甸侯綏要荒甸服之外莫近於侯服而采在侯服內百里又其最近者莫遠於荒服而流在荒服外二百里又其最遠者舉此則綏要在其中矣周禮職方氏九服侯甸男采衛蠻夷鎮蕃大行人七服侯甸男采衛要蕃皆有采無流此節蓋本禹貢而約言之

天子三公九卿二十七大夫八十一元士大國三卿皆

命於天子下大夫五人上士二十七人次國三卿二卿
命於天子一卿命於其君下大夫五人上士二十七人
小國二卿皆命於其君下大夫五人上士二十七人

此言設官之制也九卿謂三孤與六卿也畿內天子
所治於是設公以論道經邦其數三取陽數也設卿
以佐理承化其數九再倍於公也有大夫以服官政
其數二十七又再倍於卿也有元士以理庶務其數
八十一又再倍於大夫也王畿以外有公侯伯子男

以分治其國而輔之者各有卿大夫士焉惟大國之
三卿皆命於天子更有下大夫五人上士二十七人
所以具其官也次國之三卿惟二卿命於天子一卿
即命於其君其有下大夫五人上士二十七人猶之
乎大國也下而小國則二卿皆命於其君其有下大
夫五人上士二十七人亦猶之乎大國也案鄭注小
國亦三卿一卿命於天子二卿命於其君此文似誤
脫耳或者欲見畿內之國二卿與崔氏靈恩曰大國

三卿者周制立司徒兼冢宰司馬兼宗伯司空兼司
寇故左傳云季孫為司徒叔孫為司馬孟孫為司空
也下大夫五人者司徒之下置小卿二人一小宰一
小司徒司空之下亦置二小卿一小司寇一小司空
司馬之下惟置一小卿小司馬也夫諸侯之上大夫
即卿矣故曰下大夫五人也前文言小國之中卿位
當大國之上大夫下當其下大夫者崔氏謂小宰小
司徒為上小司馬小司寇小司空為下也司馬事省

惟置小司馬而魯又有夏父弗忌為宗伯或曰有禮
事即轉小司馬為宗伯如燕射之轉司馬為司正也
天子使其大夫為三監監於方伯之國國三人

此言設監之制也三監官名方伯既屬於天子之老
二人矣又慮其地遠而不及周知也於是使王朝之
大夫以為三監監臨於方伯之國每國三人所以佐
方伯領諸侯也案方伯得專征伐而監以大夫即周
大宰職所謂建其牧立其監者蓋以輕權重而制威

柄於天子也

天子之縣內諸侯祿也外諸侯嗣也

此言世祿世爵之制也天子畿內之地百官之采邑在焉是內諸侯所以為食祿者也畿外之地五等之封建在焉是外諸侯所以為嗣守者也案寰內之公卿大夫受田視公侯伯子男故通稱為諸侯至於世祿變而為世官則周禮之末失也

制三公一命卷若有加則賜也不過九命次國之君不

過七命小國之君不過五命大國之卿不過三命下卿再命小國之卿與下大夫一命

此言內臣命服之制而因及外臣之命數也卷與衮同天子而下惟三公最尊以命服之制言之三公八命亦服七命之鷩冕其有功德而加一命是為上公得服九旒九章之衮冕若更有加蓋則是君之特賜而不得過乎九命也次國侯伯之君服鷩冕而不過七命小國子男之君服毳冕而不過五命大國之上

卿中卿服元冕而不過三命下卿服絺冕而為再命
小國之卿與下大夫服爵弁而止一命皆以制有一
定不容踰越也案此章所言君命與周禮典命同而
卿大夫之命則異鄭注云不著次國之卿者以大國
之下互明之

凡官民材必先論之論辨然後使之任事然後爵之位
定然後祿之爵人於朝與士共之刑人於市與衆棄之
是故公家不畜刑人大夫弗養士遇之塗弗與言也屏

之四方唯其所之不及以政示弗故生也

此言官人與用刑之制也材質也凡民之材分不同
官之者必先審論其德行道藝之優劣論既辨而後
使之能任事而後爵之位既定而後祿之皆所以程
其實也夫人君之治天下賞與刑而已爵人者必於
朝是與士共之而非私喜也刑人者必於市是與衆
棄之而非私怒也是故公家不畜被刑之人大夫弗
養士遇之塗而弗與言也其當流者屏之四裔罪有

重輕流有遠近惟其所之而不及以賦役之政以示不欲故生之意也

諸侯之於天子也比年一小聘三年一大聘五年一朝此記諸侯之朝聘以時也比年每歲也諸侯受封在外而致臣節於天子於是有朝聘之禮比年使大夫一小聘三年使卿一大聘所以通好五年諸侯親來一朝所以述職也案小聘曰聘大聘曰殷春秋傳謂之殷聘禮是也

天子五年一巡守歲二月東巡守至于岱宗柴而望祀山川覲諸侯問百年者就見之命大師陳詩以觀民風命市納賈以觀民之所好惡志淫好辟命典禮考時月定日同律禮樂制度衣服正之

此言天子巡守和神人考法制之事也岱宗泰山也柴本作柴大師樂官之長典禮掌禮之官市典市者天子分土建國命諸侯以守之於是有巡守之禮五年一巡率以為常當巡守之歲二月先東行而至於

泰岱之下燔柴祭天望祀東方之山川遂接見諸侯
問有百年者則就見之命大師采錄民間之詩以觀
風俗之美惡次命司市納物價以觀民之所好惡若
民志奢淫則好尚邪辟而政教可知矣又次命典禮
考其時之節氣早晚月之弦望晦朔定其日之甲乙
先後同其候氣之律玉帛之禮鼓鐘之樂及制度衣
服之等級皆舉而正之使協於一也

山川神祇有不舉者為不敬不敬者君削以地宗廟有

不順者為不孝不孝者君黜以爵變禮易樂者為不從
不從者君流革制度衣服者為畔畔者君討有功德於
民者加地進律

此言東巡守黜陟之事也神祇謂羣祀君謂五等諸
侯律謂爵命之等刑賞者天子所以馭諸侯也如諸
侯於外祭之山川神祇有廢其祀典而不舉者是為
慢神而不敬不敬者君削以地於內祭之宗廟有紊
其昭穆而不順者是為忘先而不孝不孝者君黜以

爵禮樂由天子而出有變之易之者是為無法而不從不從者君流制度衣服由天子而定有革之者是為無上而畔畔者君討如治國賢君有功德於民則從而庸之而益其土地隆以爵命凡以示勸懲也

五月南巡守至于南嶽如東巡守之禮八月西巡守至于西嶽如南巡守之禮十有一月北巡守至于北嶽如西巡守之禮歸假于祖禰用特

此終言巡守之禮也假至也特一牛也天子於五月

則南巡守至於南嶽衡山其所舉行皆如東巡守之禮八月西巡守至於西嶽華山一如南巡守之禮十有一月北巡守至於北嶽恒山一如西巡守之禮由是以歸京師告至於祖禰之廟各用特牛而巡守之事畢矣案王者一歲四巡而禮無不一所以明治化之無外并無私也出既造乎禰故歸亦必假乎祖禰用特者禮從乎約推此則巡守之不為煩費如所謂兵衛省而徵求寡者從可知也

天子將出類乎上帝宜乎社造乎禰諸侯將出宜乎社造乎禰

此言天子諸侯將出而行祭告之禮也類宜造皆祭名天子為巡守而將出其事大其禮隆則類乎上帝天神遠而尊倣郊祭以致敬也宜乎社地社近人而親隨宜而告義與事稱也造乎禰至廟而告其事如生時之出必告也諸侯因將出朝王與自相朝及會盟征伐之事亦必宜乎社造乎禰而後行蓋天子有

天下受天之命而為君故類乎上帝諸侯主社稷守
君之土而為臣故宜乎社

日講禮記解義卷十三

欽定四庫全書

日講禮記解義卷十四

王制

天子無事與諸侯相見曰朝考禮正刑一德以尊于天子

此言諸侯相朝之事也列國諸侯當天子無征伐凶喪之事而彼此相見其名曰朝於是乎考禮制正刑法一德行皆所以尊天子也案春秋書滕侯薛侯來

朝穀梁傳曰天子無事與諸侯相朝正也考禮脩德所以尊天子也陳氏祥道據此以釋諸侯相見之文而吳氏澄從之蓋相見乃敵體之辭較之注疏謂諸侯朝天子者為勝也

天子賜諸侯樂則以柷將之賜伯子男樂則以鼗將之諸侯賜弓矢然後征賜鈇鉞然後殺賜圭瓚然後為鬯未賜圭瓚則資鬯於天子

此言禮樂征伐之自天子出也柷鼗皆樂器將之謂

使者執此將命也圭瓚以大圭為柄黃金為勺禮樂
征伐天子所以治天下而諸侯不敢擅焉若諸侯有
功德而天子賜之以樂於公侯也則以祝將之於伯
子男也則以鼗將之凡為諸侯者賜弓矢然後得專
征賜鈇鉞然後得專殺賜圭瓚然後得為鬯未賜圭
瓚則必求鬯於天子此所以治出於一而為有道之
時也案祝所以節一曲之始鼗所以節一曲之終事
有廣狹因以明爵之尊卑也禮八命作牧賜弓矢得

專征九命作伯賜鉞鉞得專殺祭必用鬯灌地以降
神王以圭瓚侯以璋瓚上公九命得賜圭瓚而為鬯
鬯即秬鬯秬黍一稊二米和氣所生以為酒則芳香
條鬯於上下也

天子命之教然後為學小學在公宮南之左大學在郊
天子曰辟雍諸侯曰類宮

此言天子命諸侯立學及學名也辟雍類宮皆大學
名鄭注辟明雍和也類之言班也天子始封諸侯而

命之教其民然後立為學小學方幼而養之於內故在於公宮南之左大學已成而達之於外故在於郊地之不同如此天子之德明和於上而天下化之故其學曰辟雍諸侯為天子頒教令於國中故其學曰類宮名之不同又如此張子曰此小學是教國子冑子之幼小者未能入大學則其學在宮之左右天子諸侯所視之大學必在國中無在郊之理此大學即郊學對小學而言大耳非國子冑子俊造所居若四

郊之學則鄉遂大夫教之天子諸侯亦有時行禮於其間使不帥教者觀之案詩注天子大射行禮之處水旋邱如璧以節觀者故謂辟雍諸侯鄉射之宮東西南有水而北無水形如半璧故謂類宮此蓋言其形鄭注則主其義而言之爾

天子將出征類乎上帝宜乎社造乎禰禡於所征之地受命於祖受成於學出征執有罪反釋奠於學以訊馘告

此記天子出征始終之禮也。禡師祭也。天子奉天討以正有罪，則謂之征。其將出之時，必類祭而告於上帝，宜祭而協於社，造祭而告於禡，又於行師之地，始造軍法之神而行禡祭，以為兵禱。然猶不敢自用，又必受命於祖，以卜其吉。受成於學，以決其謀。出征之慎重如此。故執罪人而旋師，則釋奠於學，以禮先師。凡生而當問訊者死而割左耳者，各具多寡之數告厥成功，猶受成之意也。案征者威武之事，然先王

用武以文任威以德蓋有非禮不行者黃氏震曰釋
奠即舍采周禮春入學舍采呂覽仲春上丁命樂正
習舞舍采蓋贄見必先用幣故事神亦先用幣釋置
采帛而奠安神位之前此禮之最重者若菜則菹也
物之薄而禮之末惟士子始入學用之學記皮弁祭
菜是也

天子諸侯無事則歲三田一為乾豆二為賓客三為充
君之庖無事而不田曰不敬田不以禮曰暴天物天子

不合圍諸侯不掩羣天子殺則下大綏諸侯殺則下小綏大夫殺則止佐車佐車止則百姓田獵

此言天子以下田獵之禮也殺獲也獲所驅之獸也綏者旂竿所建染鳥羽或旄牛尾為之詩云淑旂綏章是也下偃仆之也佐車即周禮驅逆之車驅以逐獸逆以迎獸也天子諸侯當其無事則每歲三田所謂三田者古者獲禽擇取三等自左膘而射達於右隅為上殺則以奉神而為乾豆達右耳本為中殺則

以奉人而待賓客射左髀達於右髀為下殺則以充
君之庖廚若無事而不田簡祭祀畧賓客則曰不敬
若田不以禮而多殺則曰暴天物是故天子之田不
四面而圍取之諸侯之田不舉羣而襲取之天子既
殺則下大綏諸侯既殺則下小綏大夫既殺則止佐
車以示不復殺及佐車止而後以百姓之田獵終焉
其秩然有序如此案春蒐夏苗秋獮冬狩而謂之田
者為田除害也故於取物以為用者見敬事之義又

於其不盡取者見愛物之仁

獺祭魚然後虞人入澤梁豺祭獸然後田獵鳩化為鷹
然後設罝羅草木零落然後入山林昆蟲未蟄不以火
田不麝不卵不殺胎不殀天不覆巢

此因田獵之禮而言取物之有節也梁絕水取魚者
謂水堰也罝羅皆捕鳥之網昆明也凡蟲得陽而生
故謂之昆蟲王者之取物也未有不順乎時序者故
十月獺祭魚然後虞人入澤為梁九月豺祭獸然後

出而田獵殺氣盛而鳩化為鷹然後設罝羅以捕鳥
生氣衰而草木零落然後入山林以取材木若昆蟲
未蟄則不焚林而田推之而不取獸之子不破鳥之
卵不殺傷獸之孕者不斷殺禽獸之稚者不傾覆鳥
巢之在木者皆恐戕其生也案孔疏月令正月獺祭
魚孝經緯云獸蟄伏獺祭魚則十月中也是獺一歲
再祭魚知此是十月者季春天子始乘舟薦鮓于寢
廟以鮓先至而薦之則正月不得聽民漁也

冢宰制國用必於歲之杪五穀皆入然後制國用用地
小大視年之豐耗以三十年之通制國用量入以為出
此言制國用之法也冢宰於百官之職無所不統而
國用至重尤在其所以制之必於一歲之末五穀皆
入有成數可稽然後制國中來歲之用凡國用所由
出本於地因於天計地之小大視年之豐耗積至於
三十年之久則通計之而大較可知以是而制國用
量所入以為所出使所出之數常不得浮於所入之

數而經制於是乎定矣案制國用必於歲之杪故周官於九賦之後以九式均節財用也其必合三十年之通者至此則極豐極耗之數無不見然後可以得其中制使入足供出而有餘用也

祭用數之飭喪三年不祭唯祭天地社稷為越紼而行事費用三年之飭喪祭用不足曰暴有餘曰浩祭豐年不奢凶年不儉

此言喪祭之用各有常數也飭謂十之一也越猶躡

也。紼，輶車索也。國用以喪祭為重，故行吉祭則總計一歲經費之數而用其十分之一，不敢畧於神也。有喪則三年不祭，不以凶干吉也。唯天地社稷則仍祭為越紼而行事，不以卑廢尊也。喪三年而後除其閒，禮事繁多，則總計三年經費之數而用其十分之一以送死大事，尤所不當畧也。喪祭之用或不足而廢禮，則曰暴；或有餘而沒禮，則曰浩。惟祭用數之仞，故有常制而豐年不奢，凶年不儉，無所謂有餘不足者。

而喪之用三年之仇也視此矣案喪三年不祭唯祭
天地社稷為越紼而行事儒先皆以記禮者之言為
不可從張子曰久而哀殺可齊則便可祭程子曰越
紼則是猶在殯宮於時無由可致齊又安能脫喪服
衣祭服此皆難行縱天地之祀不可廢則止可使冢
宰攝爾

國無九年之蓄曰不足無六年之蓄曰急無三年之蓄
曰國非其國也三年耕必有一年之食九年耕必有三

年之食以三十年之通雖有凶旱水溢民無菜色然後
天子食日舉以樂

此言國用所繫之重也饑而食菜則色病故云菜色
殺牲盛饌曰舉積貯者天下之大命也若國無九年
之蓄則財匱而曰不足無六年之蓄則民不聊生而
曰急無三年之蓄則危亡無日而國非其國矣是以
國依於民而民依於食使民三年耕必餘一年之食
九年耕必餘三年之食以三十年之通總而計之則

蓄積饒多有備無患雖猝有凶旱水溢民皆足食而無菜色然後天子之食每日一舉庶羞備禮即以樂侑之豈為過哉案周禮云王日一舉鼎十有二物皆有俎以樂侑食又云大荒則不舉而此云日舉以樂者正以甚言蓄積之足恃也至於國雖有備遇災而仍為貶損則又聖王畏天恤民之道也夫

天子七日而殯七月而葬諸侯五日而殯五月而葬大夫士庶人三日而殯三月而葬三年之喪自天子達

此因上言喪葬而類及之也殯葬為送終之禮而備禮之難易不同故自天子以至庶人其遲速亦異天子至尊無上以七日而殯七月而葬降而諸侯則五日而殯五月而葬又降而為大夫士庶人則三日而殯三月而葬惟三年之喪自天子達不以貴賤異也案春秋傳云天子七月而葬同軌畢至諸侯五月同盟至大夫三月同位至士踰月外姻至孔疏謂大夫除死月為三月士則數死月為三月正是踰越一月

也

庶人縣封葬不為雨止不封不樹喪不貳事自天子達於庶人喪從死者祭從生者支子不祭

此亦類言喪祭之禮也上封同窆下如字庶人之葬不用碑緯惟縣繩而下棺禮儀少故不為雨止卑無飾故不積土為封不標墓以樹賤者不得同於貴也若夫居喪無二事以一志於親則自天子達於庶人不以貴賤而異矣喪禮之衣衾棺槨從乎死者以分

不可越使死者得安其分也祭禮之牲牢器幣從乎生者以情不容已使生者得盡其情也支子不祭統於宗子也案喪不貳事故天子諒陰不言諸侯居廬未有命戒大夫既葬而致事士亦三年廢業也盧氏植曰喪中之祭虞祔練祥仍從死者之爵故小記云士祔於大夫則易牲支子不祭不主祭也如宗子為士庶子為大夫則以上牲祭於宗子之家故曰士攝大夫惟宗子此亦祭從生者之義

天子七廟三昭三穆與大祖之廟而七諸侯五廟二昭二穆與大祖之廟而五大夫三廟一昭一穆與大祖之廟而三士一廟庶人祭於寢

此言廟制之有隆殺也大祖天子初受命諸侯始封大夫始有爵者也庶人之祭謂薦物也寢適寢也凡立廟之禮降殺以兩天子有天下立七廟三昭三穆與大祖之廟合而為七諸侯有國立五廟二昭二穆與大祖之廟合而為五大夫有家立三廟一昭一穆

與太祖之廟合而為三侯國之中下士唯一廟庶人則無廟而祭於寢馬氏晞孟曰祖廟以功建百世不遷昭穆以親崇親盡則祧朱子曰凡廟主在本廟之室中皆東向及其祫於大廟之室中則惟太祖東向自如而為最尊之位羣昭之入乎此者皆列於北墉下而南向羣穆之入乎此者皆列於南墉下而北向南向者取其向明故謂之昭北向者取其深遠故謂之穆蓋羣廟之列則左為昭而右為穆祫祭之位則

北為昭而南為穆也又案此記言大夫三廟一昭一穆是祭不及高曾也程子曰自天子至於庶人五服未嘗有異皆至高祖服既如是祭祀亦當如是七廟五廟亦止是祭及高祖大夫士雖或三廟二廟一廟或祭寢廟雖異亦不害祭及高祖若止祭禰而不及祖非人道也朱子曰程子以為高祖有服不可不祭疑此最為得祭祀之本意蓋程子推喪以定祭與中庸言上祀之禮達乎諸侯大夫士庶而引三年之喪

以證之者正同所謂俟諸百世而不惑者矣

天子諸侯宗廟之祭春曰禘夏曰禘秋曰嘗冬曰烝

此言宗廟時祭之名也禘薄也禘者次第也烝衆也
進也天子諸侯因時以致祭於宗廟於春曰禘以物
未成祭品鮮薄也於夏曰禘依時次第而祭也於秋
曰嘗謂新穀熟而嘗之於冬曰烝謂物成而可進者
衆也案周禮大宗伯之職以祠春享先王以禴夏享
先王以嘗秋享先王以烝冬享先王詩小雅亦云禴

祠烝嘗于公先王禘自為殷祭與此皆不合故鄭注
疑為夏殷之祭名

天子祭天地諸侯祭社稷大夫祭五祀天子祭天下名
山大川五嶽視三公四瀆視諸侯諸侯祭名山大川之
在其地者天子諸侯祭因國之在其地而無主後者

此言天子已下外祭之有異禮也五祀見曲禮視視
其牲器之數天子有天下故祭天地諸侯有國故祭
社稷大夫有家故祭五祀惟天子有天下故祭天下

之名山大川而東南望祀於春夏西北望祀於秋冬
其祭之之禮五嶽則視三公四瀆則視諸侯惟諸侯
有國故祭名山大川之在其地者若夫天子諸侯有
所因之國而無祭主者在王畿則天子祭之在侯國
則諸侯祭之以其先嘗有功德於民故也案因國謂
先代故地而因之以為國者如子產所云遷闕伯於
商邱主辰商人是因遷實沈於大夏主參唐人是因
是也

天子犢禘禘祫嘗祫烝諸侯禘則不禘禘則不嘗嘗則不烝烝則不禘諸侯禘禘一犢一祫嘗祫烝祫

此言天子諸侯廟祭之有隆殺也犢與特同謂各祭其廟祫合也天子宗廟四時之祭於春犢禘而祫禘祫嘗祫烝歲以為常諸侯之在南方者春禘畢而夏來朝則不禘在西方者夏禘畢而秋來朝則不嘗其有嘗則不烝烝則不禘者亦類此所以重王事也諸侯禘禘則一犢而一祫嘗祫烝祫殺於天子也程

子曰諸侯亦祭祫只是祠禴嘗烝之祭為廟禮煩故
每年於四祭之中三祭合食於祖廟惟春則祭諸廟
也案禘與祫皆王者之大祭也禘者既立始祖之廟
又推始祖所自出之帝祀之於始祖之廟而以始祖
配之也祫者毀廟之主陳於太祖未毀廟之主皆升
合食於太祖也禮緯云五年一禘三年一祫張子則
謂禘也祫也郊也必歲有之豈容有三年五年之說
蓋聖人之事親也如事天每歲必郊則每歲必禘祫

可知禘以獻裸為主陽義也祫以饋食為主故謂之合食陰義也後漢張純曰禘祭以夏四月祫祭以冬十月是皆用孟月也周禮司尊彝職四時之間祀追享朝享鄭司農云謂禘祫也禘有追遠之義故謂之追享祫則羣廟之主皆升於大廟有朝之義故謂之朝享二者閒於時祭之中故謂之間祀也

天子社稷皆大牢諸侯社稷皆少牢大夫士宗廟之祭有田則祭無田則薦庶人春薦韭夏薦麥秋薦黍冬薦

稻韭以卵麥以魚黍以豚稻以鴈

此言天子諸侯之外祭大夫士庶人之內祭禮有隆殺也牢圈也牲畜於圈故曰牢天子之社稷主天下之土穀故皆祭以牛羊豕之大牢諸侯之社稷主一國之土穀故皆祭以羊豕之少牢下此而大夫三廟士一廟惟有功德而賜圭田者則祭無田則薦時物而已至於庶人春薦以韭夏薦以麥秋薦以黍冬薦以稻韭則以卵麥則以魚黍則以豚稻則以鴈取與

新物相宜也。案大夫士而有無田者，謂諸侯之大夫士以牲殺器皿衣服有所不備，故但薦而不祭。士薦牲用特豚，大夫已上用羔，所謂羔豚而祭，百官皆足也。禮不下庶人，薦於寢者，事死如生，有食味之道也。祭天地之牛角繭栗，宗廟之牛角握，賓客之牛角尺。諸侯無故不殺牛，大夫無故不殺羊，士無故不殺犬豕，庶人無故不食珍庶羞，不踰牲，燕衣不踰祭服，寢不踰廟。此類言用牲物之禮也。握謂長不出膚，膚四指也。故

謂祭饗珍之名物見內則牲之用於神者貴誠用於賓者貴味故祭天地之牛用犢其角如繭如栗祭宗廟之牛角不出握燕賓客之牛角長尺君子之用牲也必有祭事乃為神殺有禮事乃為賓殺若諸侯無故則不殺牛大夫無故則不殺羊士無故則不殺犬豕庶人無故并不得食珍辨等威且惜物力也庶羞不踰祭牲燕居之衣不踰祭服寢室不踰廟事神宜豐處已宜儉也案孔疏諸侯祭以大牢得殺牛諸侯

之大夫祭以少牢得殺羊天子大夫祭亦得殺牛其諸侯及大夫饗食實得用牛也庶羞不踰牲鄭注謂祭以羊則不以牛肉為羞不如葉氏謂庶羞是常薦於下二句為協


古者公田藉而不稅市廛而不稅關譏而不征林麓川澤以時入而不禁夫圭田無征用民之力歲不過三日田里不粥墓地不請

此詳言惠民之政也古者仁政之行至為詳備如公

田以養君子但借民力以助耕而不復稅其私田所以厚農也市則但賦其市地之廛以抑末而不征其貨所以厚商也關則但察異言異服之人以防姦而不征其稅所以厚旅也林麓川澤但戒以時入而不禁其采取所以厚民也若夫圭田為卿大夫士供祭祀者則無征所以厚君子也凡有興作用民之力雖豐年不過三日所以厚小人也田里受於公家有遂人主之者禁之使不得粥賣所以厚生者也冢墓以

族葬有墓大夫掌之者禁之使不得請求所以厚死者也案洪範八政一曰食二曰貨三曰祀四曰司空五曰司徒六曰司寇七曰賓八曰師王制自冢宰制國用以下至司寇其序正相合蓋冢宰所司食貨祀三者備矣然後以司空定民之居以司徒興民之德樂正司馬因司徒所教而升之故附於司徒而以司寇明刑終焉賓師二者洪範次於後王制敘於前蓋洪範言其切於民生之先後緩急則彙遠安邦之事

宜居養教之後王制言其關於建國之規模綱紀則
禮樂征伐之柄必在庶政之先義各有所當也洪範
作於夏而殷人守之注家以王制為夏殷之書意必
有所受矣



日講禮記解義卷十四

欽定四庫全書

經部

日講禮記解義卷十五

詳校官監察御史臣查瑩

給事中臣溫常綬覆勘

覆校官博士臣劉光第

校對官助教臣金學詩

謄錄舉人臣姚培雲

欽定四庫全書

日講禮記解義卷十五

王制

司空執度度地居民山川沮澤時四時量地遠近興事
任力凡使民任老者之事食壯者之食

此言司空居民之法也度丈尺也小而水所止曰沮
夫而水所鍾曰澤事謂制邑居民之事天子欲畫井
田以授民居必任之司空司空執度以度地里廣輪

之數為之邑井城郭廬舍以居民蓋不獨平原衍沃而已即山川沮澤亦必時其四時而量地之遠近以為民居之疏密於是制邑井則必興役事興役事則必任民力凡使民任則從輕而以老者為率食則從厚而以壯者為率所以寬之也案書所謂司空掌邦土居四民時地利者與此相表裏若夫唐虞之世禹以司空宅百揆即冢宰之任也周人建子以終為始故司空在司寇之後而實在宗伯之先此亦三代相

因之大凡矣

凡居民材必因天地寒煖燥濕廣谷大川異制民生其間者異俗剛柔輕重遲速異齊五味異和器械異制衣服異宜修其教不易其俗齊其政不易其宜

此言居民之必有所因也上制謂形制如所謂天地初制之制下制謂制度也凡民之材質不同居之者必因乎天地自然之利如西北多寒東南多煖高者必燥卑者必濕蓋由谷虛而廣川流而大既異其制

故民生其間者亦異俗才之剛柔質之輕重情之遲速各有分齊口所嗜之五味異和身所用之器械異制體所被之衣服異宜此皆出於自然而不可強也修其教以正民德而不易其俗齊其政以一民行而不易其宜則所以裁成輔相者在是矣案居民材謂因民之材質而居之能寒者使居寒能暑者使居暑則其材藝堪地氣也陳注以居為化居之居材為天生五材之材者非是

中國戎夷五方之民皆有性也不可推移東方曰夷被
髮文身有不火食者矣南方曰蠻雕題交趾有不火食
者矣西方曰戎被髮衣皮有不粒食者矣北方曰狄衣
羽毛穴居有不粒食者矣中國夷蠻戎狄皆有安居和
味宜服利用備器五方之民言語不通嗜欲不同達其
志通其欲東方曰寄南方曰象西方曰狄韞北方曰譯
此廣言異俗也雕刻也題額也交趾足拇指相向也
韞戎屨名王者之柔遠也在乎因人之性故凡中國

戎夷五方之民各有性質而不可推移地氣使然也
在東方者曰夷被斷其髮文飾其身有能不火食者
矣在南方者曰蠻雕刻其額足趾相向有能不火食
者矣以東南為陽不畏寒故也在西方者曰戎被髮
而衣皮有能不粒食者矣在北方者曰狄衣羽毛而
穴居有能不粒食者矣以西壯為陰少五穀故也然
其俗雖異而所資以生者則隨地而皆足故中國夷
蠻戎狄皆有所安之居所和之味所宜之服所利之

用所備之器五方之民言語不相通嗜欲不相同有慕義而來者不可不達其志通其欲也故設之以官東方曰寄謂寄託其意於事物也南方曰象以意倣像其形似也西方曰狄鞮遠履其事以知其言意之所在也壯方曰譯以彼此言語相騰釋也蓋性者生之質也惟奉天而親地故不可以強同在中國則疆以周索有教與政以興其德而齊其行在遠方則疆以戎索有寄象鞮譯以達其志而通其欲天地之因

物付物聖王之以人治人其理一而已矣

凡居民量地以制邑度地以居民地邑民居必參相得也無曠土無遊民食節事時民咸安其居樂事勸功尊君親上然後興學

此申言中國居民之事以見養與教之相因也凡居民者量地之大小以制國邑度地之廣狹以定民居地邑民居三者必欲其相得也惟盡地之力故無曠土惟盡人之力故無遊民食得其節事及其時民之

咸安其居也必矣由是樂事勸功而能勤尊君親上而能順然後因其從善而立學以教之此王道所由成也案周禮度地居民屬司徒宋儒謂當改屬司空先養後教為治之叙固如此

司徒修六禮以節民性明七教以興民德齊八政以防淫一道德以同俗養耆老以致孝恤孤獨以逮不足上賢以崇德簡不肖以紂惡

此言司徒教民育材之事也六禮七教八政並見篇

末司徒之職主於教民是故修六禮以節民性使不
至於流明七教以興民德使不至於怠齊八政以防
淫使知所禁戒一道德以同俗使知所率從既老吾
老即合鄉之耆老而養之以致其孝既幼吾幼即合
鄉之孤獨而恤之以逮其不足賢者難于進則上升
之以崇德不肖者惡其雜則簡去之以糾惡凡皆所
以導民于善而使之自勸也陳氏祥道曰修六禮明
七教齊八政一道德所謂教思無窮也養耆老恤孤

獨所謂容保民無疆也有以教之又有以容保之然後
上賢以崇德簡不肖以絀惡亦不變而後賞罰可言
之意也

命鄉簡不帥教者以告耆老皆朝于庠元日習射上功
習鄉上齒大司徒帥國之俊士與執事焉不變命國之
右鄉簡不帥教者移之左命國之左鄉簡不帥教者移
之右如初禮不變移之郊如初禮不變移之遂如初禮
不變屏之遠方終身不齒

此言鄉學中簡不肖以絀惡之事也萬二千五百家
為鄉者老謂致仕及鄉中老賢者朝猶會也庠鄉學
名鄉鄉飲酒也入鄉學者于一年之終大司徒命鄉
大夫簡不帥教者以告耆老皆會于庠擇元日行鄉
射禮推中而有功者居上所以尊道藝也行鄉飲酒
禮推老而齒長者居上所以尊高年也大司徒帥國
之俊士與執禮事將使不帥教者觀感而變于善也
間一年考校之而不變則命國之右鄉簡不帥教者

移之於左命國之左鄉簡不帥教者移之于右鄉大
夫之會而習射飲者如初禮至五年考校而猶不變
則移之郊學在鄉界之外鄉大夫之會而習射飲者
如初禮至七年考校而仍不變則移之遂學在遠郊
之外鄉大夫之會而習射飲者如初禮至于九年考
校而終不變乃屏之遠方終身不齒案古者六鄉各
治一鄉謂之鄉大夫六鄉聯事在國則冢宰重在軍
則司馬重在鄉則司徒重故司徒得以命六鄉即六

遂之學亦統于司徒也夫人情皆善聖人不輕絕人而固有自絕于聖人之教者惟惡者有以為懲斯善者愈有以為勸矣

命鄉論秀士升之司徒曰選士司徒論選士之秀者而升之學曰俊士升于司徒者不征于鄉升于學者不征于司徒曰造士

此言鄉學中上賢以崇德之事也學國學也征謂力役造成也三年大比之期司徒命鄉大夫論述鄉學

中才德之秀出者司徒賓之以升於司徒是曰選士
言可選而用也司徒於選士之中又論其秀出者而
升于國學是曰俊士言其在千人之上也既為選士
則不役于鄉師及為俊士并不役于司徒而皆名為
造士言其才德之有成也案秀士之論必由于鄉者
知之素也後世疏于求士而務取其所不知其亦異
于古所云矣

樂正崇四術立四教順先王詩書禮樂以造士春秋教

以禮樂冬夏教以詩書王太子王子羣后之太子卿大夫元士之適子國之俊選皆造焉凡入學以齒

此言國學教人之法也術者道路之名詩書禮樂乃入道之路也四教即四術也士升諸國學而掌其教者有樂正焉教之之法崇四術而示以入道之途立四教而予以時教之業所謂四術者詩書禮樂是也順先王之道以造成其士而春秋則教以禮樂冬夏則教以詩書蓋以講誦于冬夏為宜禮容樂聲習之

者於春秋為宜也自王之天子衆子公侯之世子卿大夫元士之適子以及鄉學所升選士而為俊士者皆造而就學焉凡入學必以齒長者賤亦在前少者貴亦在後蓋致禮讓所以重孝弟也案樂正乃樂官之長而俾之造士者樂之入人也深先王所以為教必于此始終焉若舜命夔典樂以教胄子周立大司樂以掌成均之法皆是此意

將出學小胥大胥小樂正簡不帥教者以告于大樂正

大樂正以告于王王命三公九卿大夫元士皆入學不變王親視學不變王三日不舉屏之遠方西方曰棘東方曰寄終身不齒

此言國學簡不肖之事也小胥大胥小樂正皆大樂正之屬古之教者九年而大成至是將出學小胥大胥小樂正簡不帥教者以告于大樂正大樂正以告于王王乃命公卿大夫元士皆入學而習禮以化之若不變則王親視學使習禮以化之若又不變是終

不變也王於是三日不舉以教之不至而厚自貶損
然後屏之遠方於西戎曰棘欲其亟于遷改也於東
夷曰寄言其寓此終歸也必至於終身不變然後不
齒先王於國子之不帥教者待之嚴而未嘗不厚如
此案鄉簡不帥教者而後論秀士而升之司徒國學
簡不帥教者而後論造士之秀者而升之司馬過惡
必先於揚善也

大樂正論造士之秀者以告于王而升諸司馬曰進士

此總言上賢崇德之事也鄉學之選士不征于鄉曰
造士俊士之在國學及王子公卿大夫元士之適子
德業既成亦曰造士於是大樂正統論造士之秀出
者以告於王而升諸司馬則曰進士言登進仕版之
中可受爵祿於王所也案司馬為夏官卿掌進賢興
功以作邦國其屬有司士掌羣臣之版以德詔爵以
功詔祿又有諸子掌國子之倅之教治故有造士之
秀者皆移名焉其必先告於王者以用人之權應歸

之君故也

司馬辨論官材論進士之賢者以告于王而定其論論定然後官之任官然後爵之位定然後祿之

此言司馬用人之法也王以樂正所論進士之狀授之司馬司馬乃更辨論其入官之材有不堪者屏退之獨論進士之賢者以告于王而各署其所長迨乎論擬既定然後試以所能而官使之能任此官然後以爵命之既受職位然後以祿養之凡司徒樂正所

教而成者王皆有以收得人之效矣劉氏彞曰鄉學所升曰選士不過用為鄉遂之吏而選用之權在司徒國學所升曰進士則命為朝廷之官而爵祿之權在司馬也

大夫廢其事終身不仕死以士禮葬之

此言司馬絀惡之事也大夫居其位而不能任其事則罷絀以終身而不復用死亦但以士禮葬之以示貶也案大夫致仕者死仍葬以大夫之禮若廢職不

仕已奪爵矣而猶得以士禮葬則恩與義胥見于此矣

有發則命大司徒教士以車甲

此言因徵發而專教士之責也國有軍旅徵發士卒雖屬大司馬之事王則命大司徒教士以乘兵車及衣甲之儀容以司徒主衆又主教故與司馬相參也若國子造士則庶子授以車甲司馬弗征

凡執技論力適四方羸股肱決射御凡執技以事上者

祝史射御醫卜及百工凡執技以事上者不貳事不移官出鄉不與士齒仕于家者出鄉不與士齒

此言待執技者之禮也執技者無德可稱而但論其力當其適四方必裸股肱以決射御之優劣蓋有事于外取其力之足以為武衛而已凡執技以事上者若祝若史若射若御若醫若卜若百工與夫凡執技以事上者欲其無異習故不貳事欲其有常守故不移官以執技之賤故出鄉不與士齒仕于大夫之家

者亦然必出鄉而後不與士齒者鄉黨尚齒故也徐氏師曾曰此皆謂執技之賤人非周禮太祝太史射人馭夫醫師卜師之官也

司寇正刑明辟以聽獄訟必三刺有旨無簡不聽附從輕赦從重

此言刑罰之大旨也司寇周禮刑官刑以禁寇故曰司寇辟罪刺殺也謂問其可殺也為司寇者必正定刑書明斷罪法以聽天下之獄訟于當殺者必三刺

以致其詳慎若但有發露之意旨而無簡覈之實迹則聽決為難於是附而入之則從輕赦而出之則從重所謂與其殺不辜寧失不經也案大司寇掌建邦之三典以佐王刑邦國小司寇以三刺斷庶民獄訟之中三刺者訊羣臣訊羣吏訊萬民也蔡氏沈曰簡核其實也苟無情實在所不聽

凡制五刑必即天論郵罰麗于事

此言刑所由制而欲用刑者之得其寔也論當作倫

郵與尤同凡制五刑者必即乎天倫以為之準至其施之於人則雖郵罰之輕亦必與其所犯之事相附麗而不敢失實也案書曰伯夷降典折民惟刑失禮則入刑禮刑一物也禮不外乎五倫則刑之所由制者可知矣此周禮所謂不孝之刑不弟之刑而虞書所謂象以典刑者也郵罰麗于事况五刑乎舊注以制為斷疑未盡經意也

凡聽五刑之訟必原父子之親立君臣之義以權之意

論輕重之序慎測淺深之量以別之悉其聰明致其忠愛以盡之疑獄汎與衆共之衆疑赦之必察小大之比以成之

此詳言聽訟之法也汎廣也凡聽五刑之訟以平允為主事之涉于父子者則當原其親事之涉于君臣者則當立其義明刑所以弼教此為人倫之至重必以是而權之至于事有輕重必意論其序情有淺深必慎測其量而各有以別之于厚貌者悉其聰明于

畏威者致其忠愛而務有以盡之如是而無一可疑
刑之可也若疑獄則當廣訊衆人于衆之所疑則赦
之又必于小大之罪察其事之所比以成之蓋赦之
所以釋疑而成之所以明法無徃而非公也案此言
原父子之親立君臣之義申上文必即天倫之指也
呂氏曰上下比罪鄭注謂已行故事曰比即後世之
令與例也至于比例日積而日繁所謂典文者不能
分明而欲羅元元之不逮斯豈刑中之意哉

成獄辭史以獄成告于正正聽之正以獄成告于大司
寇大司寇聽之棘木之下大司寇以獄之成告于王王
命三公參聽之三公以獄之成告于王王三又然後制
刑

此承上文而極言聽獄之慎重也史司寇吏也正謂
士師之屬獄之無疑者既定其責取之辭史以所定
者告于正正因聽察之而以獄之成告于大司寇大
司寇聽察于外朝棘木之下以獄之成告于王王慮

一官之專聽或不能無失也復命三公參聽之至三公以獄之成告于王則公議盡矣猶必三又而後制刑蓋君與臣之無不盡心于聽獄者如此案三又鄭氏謂當作三宥周禮一宥曰不識再宥曰過失三宥曰遺忘必其無當乎三事始不得已而刑加焉者在君為愛下之仁在臣有守法之義也

凡作刑罰輕無赦刑者例也例者成也一成而不可變故君子盡心焉

此言用法者之宜盡心也。例形體也。凡作刑罰者，雖輕無赦，欲民之知所畏也。夫刑之為言也，例也。例之為言也，成也。刑加于身，一成而不可復變，則斷者不可續，死者不可生矣。君子安得而不盡心乎？案既曰附從輕，而又曰輕無赦者，書所謂宥過無大刑，故無小也。

析言破律，亂名改作，執左道以亂政，殺作淫聲，異服奇技，奇器以疑衆，殺行偽而堅，言偽而辯，學非而博，順非

而澤以疑衆殺僭于鬼神時日卜筮以疑衆殺此四誅者不以聽

此列言不聽而殺之事也王者之用刑至慎也亦至嚴也其有剖析言詞破壞法律變亂名實更改制度挾異端左道而以亂政者必殺作為淫哇之聲詭異之服機變之技奇巧之器而以疑衆者必殺行雖偽而堅不可攻言雖偽而辯不可屈學雖非而涉獵甚博非既順而文飾甚澤因以疑衆者必殺僭託鬼神

之禍福時日之吉凶卜筮之休咎而以疑衆者必殺
凡此四誅者獲則殺之不用審聽以其為害大而辭
不可習也案破律改作是假事功以亂治淫聲奇技
是假玩好以亂俗行偽學非是假學術以亂教鬼神
時日是假術數以亂常觀于太公之誅華士孔子之
誅少正卯可以見聖人之識深而慮遠矣

凡執禁以齊衆不赦過有圭璧金璋不粥于市命服命
車不粥于市宗廟之器不粥于市犧牲不粥于市戎器

不粥于市用器不中度不粥于市兵車不中度不粥于市布帛精麤不中數幅廣狹不中量不粥于市姦色亂正色不粥于市錦文珠玉成器不粥于市衣服飲食不粥于市五穀不時果實未熟不粥于市木不中伐不粥于市禽獸魚鼈不中殺不粥于市關執禁以譏禁異服識異言

此因刑而言禁也數謂升縷多少譏呵察也凡執持禁令以齊衆人之不齊者雖過失不赦欲民之知所

畏也。蓋刑以懲其所已然，而禁以坊其所未然。如有圭璧金璋而為上所寶者，命服命車而為上所用者，宗廟之器以供祭祀者，犧牲以敬鬼神者，戎器以習武備者，用器與兵車不中長短之度者，布帛精麤不中升縷之數，幅之廣狹不中量者，姦色足以亂正色者，以錦文珠玉而造為成器者，衣服飲食之華美者，五穀不及其時，果實未至于熟者，木不在乎當伐者，禽獸魚鼈不在乎當殺者，皆不許以粥于市，命司關

之吏執此禁以譏察非違於異服者禁之異言者識
之凡以使民知避而勿犯焉已矣案所禁者皆不敬
不法不仁不儉之事而終之以異服異言夫異者常
之反也立我烝民莫匪爾極要使之復其常性而已
而庸有異乎

日講禮記解義卷十五

欽定四庫全書

日講禮記解義卷十六

王制

太史典禮執簡記奉諱惡天子齋戒受諫

此言天子受諫之事也惡猶忌也太史典守禮法國
有大事則豫執簡策記載所當行之禮儀及所當行
之諱惡奉而進之天子天子必齋戒以受其所教詔
焉案大史為禮官宗伯之屬掌建王之六典八法八

則大祭祀會同朝覲執書以詔王其屬小史掌詔王之忌諱不言大宗伯者其體貌尊唯詔相大禮于臨時也

司會以歲之成質於天子冢宰齋戒受質大樂正大司寇市三官以其成從質于天子大司徒大司馬大司空齋戒受質百官各以其成質于三官大司徒大司馬大司空以百官之成質于天子百官齋戒受質然後休老勞農成歲事制國用

此言百官質成之事也成計要也市即司市司會為
冢宰之屬總主簿書于歲將終以百官一歲之計要
上質于天子冢宰必齋戒而贊王以受之大樂正大
司寇市三官各以其當司成要從司會以質于天子
大司徒大司馬大司空必齋戒以受之百官位卑不
敢專達則各以其成質于三官大司徒大司馬大司
空為之質于天子天子受而平之還報于下百官亦
必齋戒以受以為天工天職而不敢忽也至此則廢

置之典行正官之事畢然後休養老者蜡祭勞農歲
事於是乎成而可以制國用矣案周官六卿分職而
此止言大司徒大司馬大司空者蓋漢制以此為三
公也

凡養老有虞氏以燕禮夏后氏以饗禮殷人以食禮周
人脩而兼用之

此言四代養老之制也凡養老之禮歷代不同有虞
氏用燕禮牲用狗一獻既畢坐而飲酒行之于寢夏

后氏用饗禮體薦而不食爵盈而不飲立而不坐依尊卑為獻取數畢而止行之于廟殷人用食禮有飲有殺雖設酒而不飲亦行于廟周人則修而兼用之陳氏祥道曰天子之于老也所養者三歲養之亦三春入學舍菜合舞秋頒學合聲于時天子視學此養于仲春仲秋者也季春之末擇吉日大合樂天子親往視之大合樂必遂養老此養于季春者也羅氏獻鳩以養之者國老也司徒以保息養之者庶老也司

欽定四庫全書

日講禮記解義
卷十六

三

門以其財養之者死政之老也凡天子入學莫不養
老又不在歲養之數案周人脩而兼用之皇氏云先
行饗次燕次食蓋既致其敬又從而安樂之義或然
也

五十養于鄉六十養于國七十養于學達于諸侯八十
拜君命一坐再至瞽亦如之九十使人受五十異糧六
十宿肉七十貳膳八十常珍九十飲食不離寢膳飲從
于遊可也六十歲制七十時制八十月制九十日脩唯

絞衾冒死而后制五十始衰六十非肉不飽七十非
帛不煖八十非人不煖九十雖得人不煖矣五十杖于
家六十杖于鄉七十杖于國八十杖于朝九十者天子
欲有問焉則就其室以珍從七十不俟朝八十月告存
九十日有秩五十不從力政六十不與服戎七十不與
賓客之事八十齋喪之事弗及也五十而爵六十不親
學七十致政唯衰麻為喪

此詳言優老之禮也粢糧也絺單被也秩常也八十

欽定四庫全書

日講禮記解義
卷十六

四

不齋則不祭也子代之祭是謂宗子不孤五十養于鄉學六十養于國中之小學七十養于大學此禮自天子達于諸侯無降殺也八十不復能來學受養君以饗食之禮使人就家致之其受君命也不能備禮惟足一跪而首再至地瞽人之拜君命亦如是九十并不必親拜得使人代受也凡所以養其生者五十異糧非少壯可比也六十宿肉恒隔日而備也七十貳膳有副而不缺也八十常珍所食皆珍美也九十

飲食不離寢恐需求無時而必以皮閣美善之味水漿之飲從于所遊可也至于送終之具六十以歲制七十以時制八十以月制九十則日脩之唯絞以束衣衾與衾以覆尸冒以韜尸四者必死而后制以其易為而不忍豫也年至五十而始衰六十非食肉不飽七十非衣帛不煖八十非得人不煖九十雖得人亦不煖矣杖也者所以扶力而優其禮也五十則杖於家六十則杖于鄉七十則杖于國八十則杖于朝

九十者天子若欲有所問焉必就其室以致其尊以珍從而致其養杖不待言也大夫士七十而致事者入至朝位君出揖即退不待朝畢八十則君每月使人致膳以告存九十則日致常膳所以優國老也五十不從力役之征六十不與兵戎之事七十并不與賓客之事八十即齋喪之事亦不及也所以優庶老也古者五十曰艾服官政故受爵于朝六十曰耆指使不能備弟子禮故不親學七十曰老故致政而傳

家事於子孫有喪惟哀麻在身而已又所以優國老也劉氏敞曰養於鄉者鄉飲酒之禮五十者始預于養也六十養于國者有命賙餽老者則及之矣養于學者則君就行焉

有虞氏養國老于上庠養庶老于下庠夏后氏養國老于東序養庶老于西序殷人養國老于右學養庶老于左學周人養國老于東膠養庶老于虞庠虞庠在國之西郊有虞氏皇而祭深衣而養老夏后氏收而祭燕衣

而養老殷人曷而祭縞衣而養老周人冕而祭玄衣而養老凡三王養老皆引年

此言古者養老之異制而總結之也皇收曷冕皆冠名深衣白布衣也燕衣黑色燕飲服之縞衣亦白布深衣也玄衣即緇衣也古之養老其地與服各有不同者有虞氏則養國老于上庠養庶老于下庠夏后氏則養國老于東序養庶老于西序殷人則養國老于右學養庶老于左學周人則養國老于東膠養庶

老于虞庠虞庠在于國之西郊也有虞氏則以皇而
祭深衣而養老夏后氏尚黑則以收而祭燕衣而養
老殷人尚白則以皐而祭縞衣而養老至周而兼用
則以冕而祭元衣而養老凡三王之養老也恐四海
之內不能遍及於是皆行引戶校年之令而恩賜其
老者焉皇氏侃曰庶老兼庶人在官者其致仕之老
大夫以上養從國老之法士養從庶老之法故外養
云邦饗者老掌其割烹養老必于學者以其為講

明孝弟禮義之所也舊說以養國老為大學養庶老為小學祭言冠養言衣者互文也

八十者一子不從政九十者其家不從政廢疾非人不養者一人不從政父母之喪三年不從政齊衰大功之喪三月不從政將徙于諸侯三月不從政自諸侯來徙家期不從政

此因養老而類言寬恤之政也從政給公家之力役也年八十者一子不從政九十者其家不從政以其

須人以養也或有廢疾非人不能養者一人不從政
有父母之喪三年不從政有齊衰大功之喪三月不
從政王畿采地之民將徙于諸侯三月不從政諸侯
之民徙于王畿采地期不從政蓋人莫哀于老莫苦
于疾莫憂于喪莫勞于徙故所以恤之者如此

少而無父者謂之孤老而無子者謂之獨老而無妻者
謂之矜老而無夫者謂之寡此四者天民之窮而無告
者也皆有常飢瘡跛躄斷者侏儒百工各以其器食

之

此言矜恤窮民之事也人之少而無父者謂之孤以其顧望無所瞻見也老而無子者謂之獨以其鹿鹿無所依也老而無妻者謂之矜以其愁悵不能寢如魚目之恒不閉也老而無夫者謂之寡以其保然單獨也此四者為天民之至窮而無所告訴故養之者皆有常餼焉其有口不能言耳不能聞足不能行與夫支節解絕容貌短小者是為瘖聵跛躄斷者侏儒

之人則使就百工之役各以其器能之所宜得者食
之下無棄人而上亦無棄事是又恤窮之仁術也案
荀子曰五疾上收而養之材而事之晉語胥臣對文
公曰威施權鑄邁蔭蒙瑇珠儒扶廬矇矇循聲聾瞶
司火其童昏聵瘖僂僂官司所不材宜于掌土淮南
子曰伊尹之興土功也脩脰者使跣鑊強脊者使負
土眇者使之準僂者使之塗是之謂各以其器食之
道路男子由右婦人由左車從中央

此言男女有別之事也在道路男子常由右婦人常由左而車則從乎中央行有三塗以遠別也案地道尚右故男右女左

父之齒隨行兄之齒鴈行朋友不相踰輕任并重任分斑白者不提挈君子耆老不徒行庶人耆老不徒食

此又推言尊者老之義也君子謂士以上與父之齒相若者隨從其後而行與兄之齒相若者如鴈飛之次而行年相若之朋友則並行而不相踰至或有所

擔負老少俱輕則并與少者老少俱重則分為輕重
而以其重與少者班白之老即不復手自提挈而有
少者以代之故者老之中有君子焉行必有車不徒
行也有庶人焉食必有肉不徒食也先王之世敦崇
孝弟始自朝廷而達于天下為子弟者莫不知尊德
而養老雖在道路亦翕然有敬讓之風王道之成見
于此矣故述王制者以是終焉

大夫祭器不假祭器未成不造燕器

此言大夫重祭之事也有采地之大夫必自造祭器而不假諸人若祭器未成則不造燕器先神而後人也皇氏云若無地大夫則當假之故禮運云大夫祭器不假聲樂皆具非禮也

方一里者為田九百畝方十里者為方一里者百為田九萬畝方百里者為方十里者百為田九十萬畝方千里者為方百里者百為田九萬億畝

此以開方之法記井田之制也方一里者凡為田九

百畝方十里者有百箇一里之方是為田九萬畝方百里者有百箇十里之方是為田九十億畝方千里者有百箇百里之方是為田九萬億畝孔䟽步百為畝長一百步闊一步畝百為夫是一頃也長闊一百步夫三為屋是三頃也闊三百步長一百步屋三為井是九百畝也長闊一里陳氏澔曰方千里當云九千億畝或九萬萬畝經文誤案此以下皆申釋前文古經後有記皆如此縱橫百里則九百萬畝此大國之數縱橫千里則九萬萬畝

此一州之數朱子謂漢儒硬造這算法是也綜其寔田可井則井之不可井即截長補短有百畝之地便可授一夫有二十五畝之地便可授一餘夫此方田所以為九數之首也今積步法即古方田法

自恒山至于南河千里而近自南河至于江千里而近自江至于衡山千里而遙自東河至于東海千里而遙自東河至于西河千里而近自西河至于流沙千里而遙西不盡流沙南不盡衡山東不盡東海北不盡恒山

凡四海之內斷長補短方三千里為田八十萬億一萬億畝

此記四海之內地遠近里數也一萬億畝之上衍萬億二字自恒山至于南河千里而近為冀州域自南河至于江千里而近為豫州域自江至于衡山千里而遙為荊州域自東河至于東海千里而遙為徐州域自東河至于西河千里而近亦為冀州域自西河至于流沙千里而遙為雍州域統而論之西不盡于

流沙南不盡于衡山東不盡于東海北不盡于恒山
凡四海之內截長補短方三千里計為田八十一萬
億畝陳氏澹曰方三千里當云八十一萬億畝案禹
貢序九州自冀州始唐虞至商皆都冀三面距河此
云南河東河西河亦主冀州言之南北為經東西為
緯自恒山至南河而至于江而至于衡山以經言自
東河至東海自東河至西河而至于流沙以緯言也
主冀州故冀州之域兩言之

方百里者為田九十億畝山陵林麓川澤溝瀆城郭宮室塗巷三分去一其餘六十億畝

此再言百里田畝之數也方百里者為田九十億畝其間有山陵林麓焉川澤溝瀆焉城郭宮室塗巷焉三分而去其一餘以授民凡六十億畝前文既以開方法計疆域之數此復舉一大國以約計其田畝之實而七十里五十里之國可知

古者以周尺八尺為步今以周尺六尺四寸為步古者

百畝當今東田百四十六畝三十步古者百里當今百
二十一里六十步四尺二寸二分

此總言井田畝步之數也今謂漢東田即詩所謂東
南其畝之東也古者步大以周尺八尺為步今以周
尺六尺四寸為步則一步為五十二寸比古者每步
剩出一十二寸以此計之則古者百畝當今東田百
四十六畝有奇古者百里當今百二十一里有奇此
古今之田里所以有長短廣狹之不同也案鄭注云

周尺之數未詳聞也陳氏祥道曰周法十寸八寸皆為尺考工記于案言十有二寸于鎮圭言尺有二寸此十寸尺也說文咫八寸周尺也古者以周尺八尺為步今以周尺六尺四寸為步六尺四寸乃八尺也蔡氏元定曰以十寸之尺起度則十尺為丈十丈為引八寸之尺起度則八尺為尋倍尋為常蔡邕獨斷云夏以十寸為尺商以九寸為尺周以八寸為尺季氏本曰六尺為步古法也自后稷以來即有一畝三

畎畎廣尺深尺之說則六尺為步不始于周矣朱子曰古以百步為畝今以二百四十步為畝百畝當今四十一畝或曰周尺當今營造尺六寸四分今方五尺為步在周止方三尺二寸周以百步為畝今二百四十步為畝則周百畝當今二十五畝六分漢景帝始定二百四十步為畝王制作于文帝時故猶以百步為畝

方千里者為方百里者百封方百里者三十國其餘方

百里者七十又封方七十里者六十為方百里者二十
九方十里者四十其餘方百里者四十方十里者六十
又封方五十里者百二十為方百里者三十其餘方百
里者十方十里者六十名山大澤不以封其餘以為附
庸閒田諸侯之有功者取于閒田以祿之其有削地者
歸之閒田

此記畿外八州建國之法也天下九州王畿居中其
外八州每州方千里是為方百里者百也內封公侯

百里之國凡三十尚餘七十箇方百里又封伯七十里之國六十是去二十九箇方百里又四十箇方十里也尚餘四十箇方百里六十箇方十里又以封子男五十里之國百二十是去方百里者三十也所餘者止有十箇方百里六十箇方十里而已通除三等封國及名山大澤不以封因以所餘者為附庸以及閒田凡諸侯之有功者即取于閒田以祿之其有削地亦歸之於閒田焉周氏謂曰所謂封國之數非實

有此國特計其地之廣狹所能容者也周官職方謂
凡邦國千里封公以方五百里則四公方四百里則
六侯方三百里則十一伯方二百里則二十五子方
百里則百男以周知天下蓋以一千里度之則天下
可以周知法與此同

天子之縣內方千里者為方百里者百封方百里者九
其餘方百里者九十一又封方七十里者二十一為方
百里者十方十里者二十九其餘方百里者八十方十

里者七十一又封方五十里者六十三為方百里者十
五方十里者七十五其餘方百里者六十四方十里者
九十六

此記畿內之制也天子之畿內地方千里是為方百
里者百也內封公之國方百里者九尚餘九十一箇
方百里又封卿之國方七十里者二十一一是去十箇
方百里二十九箇方十里也所餘八十箇方百里七
十一箇方十里又以封大夫之國方五十里者六十

三是去十五箇方百里七十五箇方十里也所餘者
六十四箇方百里九十六箇方十里而已陳氏澔曰
畿外封國多而餘地少廣封建之制于天下畿內封
國少而餘地多備采地之分于王朝也案畿內餘地
所以多者當是天子自有之以為居重馭輕之勢如
秦分天下為四十郡漢初承之大啟九國而漢自得
十五郡也

諸侯之下士祿食九人中士食十八人上士食三十六

人下大夫食七十二人卿食二百八十八人君食二千八百八十人次國之卿食二百一十六人君食二千一百六十人小國之卿食百四十四人君食千四百四十人次國之卿命于其君者如小國之卿

此申言侯國君臣制祿多寡之法也大國祿食之數以等而推則諸侯之下士可食九人中士倍下士食十八人上士倍中士食三十六人下大夫倍上士食七十二人卿四倍于大夫食二百八十八人君十倍

於卿食二千八百八十人次國之卿三倍于大夫食
二百一十六人君十倍于卿食二千一百六十人小
國之卿一倍于大夫食百四十四人君十倍于卿食
千四百四十人次國之卿命于其君者止如小國
之卿食百四十四人以其降于天子所命故也孔疏
云天子之士卿大夫無文宜準大國之卿大夫士也
案庶人在官者之祿有食九人至五人之差下士皆
視上農之食九人所以優士

天子之大夫為三監監于諸侯之國者其祿視諸侯之卿其爵視次國之君其祿取之于方伯之地方伯為朝天子皆有湯沐之邑于天子之縣內視元士

此申言三監之制也天子使其大夫為三監監于諸侯為方伯者之國其祿視大國之卿其爵視次國之君其祿則取于八州方伯之地方伯朝于天子皆有湯沐之邑于天子之縣內以給齋戒自潔清之用其數視元士亦五十里以下案三監之祿視諸侯之卿

者其食少爵視次國之君者其體尊蓋視子男而一隆之一殺之也

諸侯世子世國大夫不世爵使以德爵以功未賜爵視天子之元士以君其國諸侯之大夫不世爵祿

此申言內外爵祿之制也諸侯之世子得世國而不得世爵天子之大夫不得世爵而但得世祿蓋先王之于臣使之任事必以德爵之命數必以功所以皆不世爵也諸侯之世子世國必請命于天子賜之以

爵而後得如先君之舊若未賜爵則其衣服禮數但視天子之元士以君其國諸侯之大夫不惟不得世爵并不得世祿此待內外臣之別也程子曰古者使以德爵以功世祿而不世官故賢才衆而庶績成及周之衰公卿大夫皆世官政由是敗矣

六禮冠昏喪祭鄉相見七教父子兄弟夫婦君臣長幼朋友賓客八政飲食衣服事為異別度量數制

此申言司徒所掌之事也司徒所掌者有六禮焉嘉

則為冠為昏凶則為喪吉則為祭賓則為鄉為相見
所謂修之以節民性者如此有七教焉親屬父子睦
屬兄弟別屬夫婦義屬君臣序屬長幼信屬朋友讓
屬賓客所謂明之以興民德者如此又有八政焉飲
食則資以養生衣服則藉以適禮事為則著于百工
之技藝異別則見于五方之器械度與量則辨其長
短小大數與制則區其多寡廣狹所謂齊之以防淫
者如此

日講禮記解義卷十六